

Excelente workshop duna door di experto Mericano

Biblioteca Nacional di Aruba awor ta cuminza haci mas uso di video pa duna informacion na usarionan



ORANJESTAD (AAN): Na un forma hopi inovativo, Biblioteca Nacional di Aruba ta sigui moderniza su mes, y alavez crea formanan nobo pa por comunica cu su usarionan, y cu pueblo di Aruba en general.

E siman aki, DIARIO a haya sa di un proyecto nobo cu ta bay pone Biblioteca Nacional di Aruba eleva su nivel di alcance

na un audiencia mas amplio.

Specialmente pa e celebracion di Bibliotheekdag riba Dialuna cu a pasa, Aruba a ricibi bishita di señora Claudia J. Dold, kende ta un Bibliotecario di University of South Florida Libraries. E bishita di Señora Claudia Dold a worde coordina door di Ronny R. Alders pa Biblioteca Nacional di Aruba.

El a bin no solamente pa Bibliotheekdag, sino pa duna workshop.

Debi na un cooperacion internacional entre Biblioteca Nacional di Aruba y diferente Universidad Mericano, y danki na contactonan cu Acuril, y IFLA, profesionalnan yama pa Aruba ta bin duna lectura.

“Lecturanan asina ta importante pa nos, pasobra e ta un forma un brug entre Aruba y Merca,” Ronny R. Alders a declara den un entrevista cu DIARIO.

E bishita di Sra. Dold tabata riba invitacion di Astrid Britten, directora di Biblioteca Nacional di Aruba.

Riba Diamars ya caba el a duna un workshop, y e ultimo lo ta awe Diaranzon. Sra. Claudia Dold ta duna workshop encuanto implementacion di videos pa por amplia e spectrum di servicio y informacion cu e

Biblioteca di Aruba ta ofrece.

Esaki lo impulsa e Biblioteca local, pa keda cu e trend di informacion electronico di e epoca nobo aki.

Loke Sra. Dold di USF



University Libraries ta haciendo, ta forma parti di un cooperacion internacional, unda Bibliotecanan rond mundo ta cuminza coopera cu otro institucionnan.

Ronny R. Alders a splica, cu Aruba su Biblioteca tin hopi bon cooperacion cu University of Illinois at Chicago, tambe cu State University of New York in Buffalo, y University of South Florida.

Den un entrevista, Sra. Dold a splica cu e ta duna workshop con pa crea video di como 3 te 5 minuut, cu ta sirbi pa duna informacion na bishitantenan di Biblioteca, of esnan cu ta bishita BNA su Website.

Por ehemplo, recien mes tabatin e Green Education Symposium, y e grabacionnan cu a worde haci aki, lo ser inclui den un video. E video aki lo wordo poni riba e website di Biblioteca, via link di YouTube, y e ta worde usa pa asina alcanza un audiencia mas amplio.

Usando software di Camtasia, ta crea video pa asina usa grabacion di tur clase di informacion, di tur ramo di educacion, simposionan, lecturanan, y hasta fiesta recien di Sinterklaas.

“E videonan aki ta dun publico mesora e informacion kico Biblioteca Naciona

di Aruba tin pa ofrece pa educacion, y tur cos,” Sra. Dold a indica na DIARIO.

E ta mas bien un video chikito, un sinopsis di loke e storia mas grandi ta. Pues tur cos ta bay ta gelinked riba e website di Biblioteca Nacional di Aruba.

E workshop ta yuda e personal di Biblioteca crea video pa hopi topico, por ehemplo demostra con ta usa cierto program.

Ban ta sincero. Nos studiantenan awendia a crece cu tecnologia. Nan ta mas comfortable di haya acceso online di video y haya info di e forma ey. Pa un Biblioteca keda cu e trend, corda cu semper ora di lesa buki, e unico cu e tin ta texto. Pero Video tin algo visual, sonido, y ora tin subtítulo, bo por

hasta lesa e texto. Pues awor Biblioteca usando video, por haya forma pa contact hende cu mas sentido.

Algo cu DIARIO a keda impresiona cune, ta cu e videonan awor ta bin cu subtítulo y den e idioma di bo escogencia.

Esaki ta globaliza Biblioteca di Aruba. Materialnan di Video na Papiamento, lo tin traduccion den mas idioma simultaneamente. Esey ta pone pues, cu awor Biblioteca ta ofrece su productonan na tur hende na Aruba y paisnan Caribense.

Por ehemplo e lectura di Mental Health teni recien pa Dr. Ardis Hanson di USF, por worde comparti den henter Caribe, y tur hende por discuti esaki. Pasobra e ta aparece den tur idioma. Y esaki ta e

meta di Biblioteca! E sistema di Biblioteca mester cambia.

No pasobra awor tur cos ta computer, esey nifica cu Biblioteca ta bira obsoleto. Esun di Aruba ta sigui cu e trend! Tin computernan instala cu Internet gratis. Y ademas, Biblioteca tin programa di lesamento pa mucha chikito. BNA ta sigui promove lesamento cu bukinan nobo y festival di buki pa mucha.

DIARIO ta felicita Biblioteca Nacional, cu su directora Astrid Britten, como tambe e coordinador Ronny R. Alders, y tambe e bishitante Sra. Claudia Dold, pa e bon trabao pa asina nan keda up to date cu tur avance tecnologico.